

續修廬州府志卷九十七

花翎道銜江南安徽廬州府知府清泉黃 雲總修

平寇紀畧

下

劉銘傳將攻江陰李鶴章先遣七營赴楊舍助之七月初五日銘傳至石牌港初二日以二營進屯黃山港令周盛波以三營屯長山賊至黃山夜撲營劉東堂伏濠堵擊銘傳聞鎗聲急起援卻之黃翼升令賴榮光龍玉鱗水師進黃田港已敗賊前鋒而港路狹哨官周茂發廖洪材戰歿師船未得退槍子洞榮光胸達於背遽殞玉鱗亦以槍傷旋卒初七日駱國忠二營進大馬橋者貴敗賊黃山周盛波敗賊東門初八日銘傳復以二營

續修廬州府志

卷九十七

平寇紀畧下

一

屯二里街初九初十日以三營迤出廟山扼駐十一日以六營薄城下周盛傳敗東門賊銘傳毀北門賊營十二日銘傳盛波會攻東門石營賊壘石安炮爲犄角守之乃令一營直隘道以洋槍當賊炮口使不得發軍士越濠入盡殲之餘營皆破斃僞將以下多人斬馘千餘盛傳守之設大炮攻城十三日陳坤書由常州來援已至塘溪銘傳盛波急攻城十四日炮毀東門女牆援賊由南門至敗之十六日僞護逆區逆齊逆竝襲我後盛波令所部分禦賊而設伏橫截之賊退距河爭渡乘之斃無數十八日援賊復進鶴章由常熟至以洋槍隊敗之益檄召常熟福山張樹珊等軍途中阻賊且戰且行

復召郭松林等軍二十六七日松林破祝塘橫塘賊巢  
追出周莊與樹珊會偕至江陰賊方自江濱東至山口  
傍河築木城十餘里乃諭松林督樹珊等七營由山陰  
繞其背銘傳所部循山麓搗其中盛波盛傳循城出其  
右先擊東南大隊援賊又以四營出城西綴無錫援賊  
而黃翼升水師扼江干會勦二十九日銘傳誘賊出拒  
松林軍突自山巔下大呼斫賊銘傳軍益奮迅賊大潰  
死者山積附城賊營壘盡毀逐過南門十里焚其輜重  
二百餘艘城西賊營次第皆毀翼升水師破面江賊營  
官軍乃薄城八月初一日炮壞城數處賊有爲內應者  
夜分軍梯而登焚城樓賊數千尙巷戰或由西門遁復

擊斬之僞廣逆李愷順墮水死乃克江陰縣城劉秉璋  
潘鼎新等亦克浙江嘉善縣之楓涇西塘鎮初鴻章令  
秉璋鼎新張遇春楊鼎勛進軍七月十二日抵楓涇北  
官塘天雨賊大至鼎新軍擊卻之十三日數道竝進賊  
拒不出嘉善賊來援水師徐道奎蔡東川拔河椿深入  
繞其西敗之鼎勛等設浮橋渡河出東北毀其三壘七  
卡曾守忠炮船克茜涇賊營於是嘉興平乍之賊至者  
三四萬人分據干窰西塘十八日秉璋等由楓涇進西  
塘太湖水師二營來會淮揚水師張元龍由蘆魁塘攻  
西柵楊宏勝朱開泰由楊漚攻北柵十九日方出師干  
窰賊驟至水師炮卻之烏涇塘援賊與西塘賊出南柵

鼎勛與戰傷膝賊少卻水師入烏涇塘登岸斷干窰之道賊遂潰元龍宏勝等破北西柵賊壘斬馘千人餘賊竄干窰二十一日鼎勛令劉起往破干窰獲數賊酋斬之鴻章之與李朝斌出巡也楓涇之捷適至營復自吳江花涇港溯吳淞北行至蘇州婁門程學啟營謀軍事七月二十五日至常熟次日方視王莊大河防軍而僞納逆郜雲官以蘇城賊二萬出陷金匱縣之蕩口鎮常熟防軍多赴攻江陰乃檄滕嗣武黃中元張樹聲吳建瀛等十一營王東華等水師四營援蕩口二十八日陸師遇賊謝家橋大破之追奔二十餘里次日躬督水師至復破餘賊逐之至蘇州齊門又破黃埭賊營俘斬數

千人聞江陰之捷八月初四日遂由福山抵江陰周視城守疏請降將駱國忠署京口協副將率所部駐之因疏陳籌畫情形畧言兵力苟足卽分三路進常州無錫及蘇州之閶門使賊首尾難顧無如臣部陸師不過四萬東自金山衛海塘西至江陰橫亘五百餘里面面賊巢處處喫重蘇州四圍皆水賴有淮揚太湖兩水師分段扼駐以補陸軍所不逮若更遠畧常州斷難自相照攝計今以規取蘇州爲要務而蘇州陸路有三由胥門閶門達吳江平望程學啟令水陸五營扼之由婁門達崑山程學啟自率陸師十營水師三營扼之由閶門滄關達無錫須俟無錫攻克始能進兵是故吳江爲南路

咽喉無錫爲北路咽喉欲披其腹心宜搯其咽喉現踞  
常州之僞護逆陳坤書有眾十餘萬素強盛雖經擊敗  
難保不圖再逞踞無錫之僞潮逆黃子澂有眾五六萬  
堅守不出當飭各軍乘勢蹙之擬令劉銘傳率所部九  
營進江常錫三界之青暘鎮兼防護逆繞襲我後周盛  
波率六營進無錫之芙蓉山郭松林率六營進無錫之  
緱山張樹聲滕嗣武率十營進張涇橋爲松林盛傳後  
路援應又令黃中元率三營進蕩口前之大橋角以備  
蘇賊竄常熟之道凡此數路黃翼升均撥師船相爲依  
護以固糧路而助攻勦李鶴章自督小隊往來調度總  
期進可勦賊止可自立程學啟旣屯外跨塘離婁門七

里蘇州賊附城築堅壘十有九炮遠不能及學啟乃移  
營前八月初四日至永安橋賊由婁葑齊三門出洋人  
百餘舁炸炮助賊學啟水陸三路當之賊發炮彈多不  
炸敗入城遂營永安橋以薄城旋令陳東友成俞卿炮  
船下黃天蕩李朝斌水師入黃天蕩寶帶橋與陸師會  
初十日譚紹洸黃子澂等七逆酋以六萬人分門出學  
啟復分應之戰竟日賊始敗斬賊二千游擊龔生陽都  
司鄭國榜皆重創十一日賊李秀成自金陵返蘇州圖  
解圍戈登亦率常勝軍至屯外跨塘與學啟會勦婁葑  
門外賊壘旣多且固時發炸炮拒我猝不得前而城東  
南寶帶橋實爲太湖鎖鑰明徐達破張士誠故道也賊

立石營一土營三守之學啟戈登謀先破此十六日水陸皆至先乘土營宋有勝張行科襲其右陳忠德朱寶元襲其左水師入尹山橋爲中路李朝斌督所部八營竝輪船大炮擊之戈登亦乘輪船與法國兵官龐發相繼至賊棄壘奔截殺之石營旋潰追之至盤門毀途中十餘卡將退師而李秀成親將悍賊出學啟令諸軍忍饑復戰至暮賊卻學啟朝斌分水陸留要道屬戈登龐發屯寶帶橋鴻章檄張遇春等四營往助時進無錫之軍十一日郭松林至緱山十二日破賊營於新塘橋久攻不下松林與部將王平西易用剛李長樂裹重絮禦賊槍踰濠乘牆手刃黃衣賊數人賊駭散追之亭子橋

僞潮逆以城賊出拒復敗之刃及其肩幾就擒賊亦矛傷松林股始逸去二十日李鶴章令張樹聲滕嗣武列隊於芙蓉山禦賊以立營賊出惠山西北塘頭嚴埭敗之追入嚴埭王東華水師入大圩夾擊奪其卡追至塘頭復毀其營二十二日松林嗣武自東亭追賊及東門分隊擊走南門賊東華與周盛波擊西門賊於張巷寺頭焚浮橋張樹珊董鳳高逐賊至北門水師渡河焚賊船二十六七日僞侍逆李世賢僞璋逆林紹璋率賊數萬自南門至坊前梅村而高橋賊數千至西高山出芙蓉山後城賊出北門犯塘頭東亭二十八日鶴章登緱山分遣諸軍應賊盛波東華進高橋塘頭西高山牽賊

勿東樹聲由東亭敵城賊樹珊嗣武出梅村坊前之後  
松林進緱山東以馬隊擊村落散賊令吳建瀛過河設  
伏自率李長樂易用剛誘擊伏起賊亂走坊前樹珊嗣  
武適至擒斬千人麻塘賊聚大骨橋憑河拒樹珊由東  
亭渡河與張士芳彭述清合擊之叢樹中驟出萬人水  
陸來犯樹聲揮軍截之沈其炮船樹珊嗣武追賊近南  
門復馳回合擊賊遁楊名大橋口復遇松林軍奪賊船  
百餘艘擒其酋數十人西路則盛波令楊長有周盛朝  
進姑亭廟扼西高山賊胡金元劉啟福迎高橋及北門  
之賊而自率大隊敗賊塘頭循河抵城下賊恃眾將逾  
河乘其半濟擊之殺無算金元啟福亦捷各軍旋歸營

二十九日李秀成由蘇州集僞納逆邵雲官等七賊之  
眾水陸十萬偪我大橋角之營逆夷白齊文以輪船大  
炮助之鶴章急遣張涇橋十二營往援三十日賊盡銳  
攻大橋角發西洋三十二磅炸炮炮彈墮營中所觸皆  
糜軍士死枕籍勢甚殆周壽昌乘閒率死士持連珠噴  
筒火器膝行伏河干發之猝中輪船藏火藥所聲大震  
而裂尺木片肉飛如雨竝焚其長龍炮船斃賊及洋人  
數百賊船大亂移南岸而陸隊仍由浮橋渡河圍壽昌  
及吳勝清營悍賊實草於濠蔽藤牌以登輒槍斃之尸  
填濠復進而鶴章援軍疾馳四十里適至賊乃退鶴章  
令張樹珊等十營之眾援勝清營餘軍及黃翼升水師

援壽昌營樹珊軍戰久不決擲火蛋焚賊藥簍以馬隊  
洋槍乘之賊始潰溺於河者蔽流追奔至后宅翼升軍  
毀賊炮船猶相持猝見悍賊敗奔乃亦張帆遁壽昌開  
營門設浮橋渡眾橫擊之圍悉解賊夜退黃埭九月初  
一日鶴章令嗣武樹聲復勦敗之追至望亭距河而返  
別股賊犯緱山圍吳建瀛營郭松林援之斃賊千人初  
二日僞潮逆黃子澹乘我軍援大橋角未返出犯芙蓉  
山周盛波敗之賊之犯大橋角也探防軍止三營易破  
破則達常熟太倉擾我後路不虞復挫賊死萬人失兩  
巨酋李秀成痛哭去白齊文亦以此不慊於賊初白齊  
文匿上海掠我所租二火輪船以獻賊追之不及大橋

角所燬其一也八月十九日李秀成先攜之攻我寶帶  
橋營程學啟李朝斌戈登水陸合禦竟日始卻之二十  
六日閩齊門出賊萬餘攻鄭國魁劉士奇營不逞越二  
日秀成乘輪船由齊門抵西白蕩漕莊口譚紹洸出葑  
門分道來犯水師迎擊其輪船不得出湖譚紹洸眾亦  
返秀成始謀改道由虎邱望亭犯大橋角初二日蘇賊  
復由齊婁葑三門舁大炮攻我營學啟分禦之而嘉興  
賊廖發受蔡元澂二十九日犯吳江七星橋何安泰阮  
炳福吳毓芬并擊之炳福傷左脅初一日戈登往援始  
敗賊我軍既得寶帶橋而賊尙踞五龍橋以通蘇浙學  
啟與戈登圖之十一日學啟令周良才劉士奇歐陽利

見守永安橋自率水陸八營由寶帶橋戈登乘輪船與正林水師由鮎魚口會攻其左右朝斌水師進澹臺湖先後破賊大營獲其大炮十有四截殺逸賊幾盡譚紹洸援自盤門張遇春敗之時嘉湖賊屢至同里犯平望安泰毓芬方敗賊長板橋大江橋水師復敗賊方尖橋而百龍橋八坂皆賊營十四日學啟屬戈登守五龍橋自以水陸分道往一由太湖南沙一由同里長生橋一由萬頃橋戈登亦遣洋人克根木馬格里以炸炮輪船助十五日諸道並進途中賊卡俱下會軍於八坂擒偽貴逆陳得勝及悍賊千餘斃賊三千毀賊三十餘營獲賊船數百艘炮船四十艘追賊至平望斷其橋偽會逆

榮逆僅以身免遂令陳有昇梁安邦二營駐五龍橋張遇春二營駐寶帶橋鄭國魁二營移守長生橋自我軍進永安橋而婁門道絕進寶帶橋而葑門道絕進五龍橋而盤門出太湖之道亦絕蘇州賊益氣奪李秀成旣敗大橋角復由蘇州無錫溧陽宜興聚賊八九萬船千餘艘泊運河口自將悍賊踞金匱縣之后宅而令各逆酋由望亭后宅屯營互進九月初四日郭松林所部勦賊麻塘追至后宅歸途復阻賊萬餘松林力戰始出守備楊人傑把總但成喜死之俱請卹滕嗣武張樹珊亦敗賊鴻山李鶴章謂諸將賊方步步爲營以逸待我勞我軍亦宜制之以營勿浪戰遣嗣武樹珊赴大橋角立



五營初八日鶴章自督軍設浮橋至后宅秀成率黃衣賊隊出距奮前奪其卡賊歸護之秀成營前敵壘尤堅其西三里皆賊連營倚河自固攻之不克鶴章復益三營大橋角初九日松林敗賊鴻山十一日又敗僞金逆之眾於坊前梅村追至下田橋十三日秀成犯安鎮松林擊走之陳坤書方踞江陰西南焦店芙蓉圩並於斜陽橋三河口築壘初二日劉銘傳由青暘涉水攻芙蓉圩戰斬擒僞將不少坤書浮水逸圩賊悉走初五日擊走焦店賊十一二日會同無錫芙蓉山周盛波之軍擊李世賢之眾於西高山破之賊退高橋鴻章以諸巨酋全集西路志在保無錫以援蘇州檄鶴章銘傳松林等

固後路抽精銳乘間翻營擊賊而令程學啟戈登由蘇城西北橫出賊後在籍郎中潘曾瑋率民團助勦獻議攻蠡口黃埭賊營學啟從之十九日戈登乘輪船夜往二十日曾瑋率炮船民團來會學啟令劉士奇出隊漕莊口綴城賊蠡口營破戈登守之學啟逼齊門破城中援賊十月初一日會進黃埭僞將萬國鎮戰敗突圍以洋槍隊躡之水師登陸斬國鎮及其眾二千人黃埭亦平而蘇錫之交李秀成踞后宅西倉麻塘橋李世賢則北踞惠山高橋南及坊前梅村數十里九月十六日周盛波擊走芙蓉山賊連破雁臺塘頭鎮二十四日賊犯緱山郭松林設伏安鎮興隆橋賊駭而奔秀成欲西合

世賢復犯大橋角黃中元擊走之毀后宅南塘賊十一營秀成移踞麻塘而世賢踞東亭二十七日由坊前梅村東亭鴻山列隊數十里復欲犯緱山鶴章謂賊屢敗中實餒宜滾營逼勦之令周盛波進與隆橋與劉銘傳炮隊合攻坊前張樹聲進中安橋與郭松林炮隊合攻梅村麻塘橋自率洋槍隊應之二十八日盛波敗賊興隆橋追至東亭繞鴨城橋世賢率眾來犯盛波約松林急進僞武逆汪有維方竄緱山松林等追賊嵩山復進梅村西倉先毀梅村賊十餘營奪賊船數十艘擒僞官李生香以下酋數十斃僞渠唐政才秀成由麻塘來援松林令吳建瀛攻西倉而自督隊敗秀成抵麻塘秀成

奔入營建瀛已破西倉會軍至麻塘復合破其三營而秀成石營終不克松林傷乃返十月初二日世賢由東亭犯鴨城橋盛波閉營守潛出隊襲賊後賊乃潰追之方逾橋他賊復大至鶴章先馳往令松林進坊前樹聲進嵩山盛波軍專敵世賢敗之益飭諸將次第翻營逼世賢以半隊出擊護其後築壘初八九日諸軍俱已逼賊猶阻於河初十日銘傳松林復進營河干秀成突出大隊嵩奚兩山樹珊方翻營卽與賊戰符信余思樞橫擊之追至西倉礮毀其二十餘營十一日鶴章銘傳合擊世賢營毀其牆數丈劉盛藻率親兵越而入賊營皆月牆密穴其上發火槍如雨仍不克而我蘇州軍已奪

許關賊聞皆驚十二日大橋角守將滕嗣武黃中元乘霧攻嘯傲涇破賊四營是日世賢約陳坤書等三酋由常州來助黃子澹亦自無錫出至新塘街鶴章令樹聲松林設伏世賢營後水師綴其眾不得與援賊合乃分道擊援賊屢敗之十三日復繞東亭要道築一營賊漸怖銘傳等乃乘夜襲世賢焚其更樓伏驟發破世賢士城餘賊皆走世賢猶踞浮橋樹聲等救援賊回軍至世賢乃大奔追至南門尙未曙疾抵麻塘擊秀成分道設浮橋發諸火器賊潰掩殺逾萬坤書遁歸常州世賢遁宜興溧陽而秀成亦由繞靈巖木瀆入蘇城學啟之奪許關也在初九日蘇城惟閫門由許關尙可達無錫僞

來逆率悍賊守之戈登先往學啟由黃埭進軍自當中路四營張左右翼黃翼升等水師助之戈登已破王瓜涇賊營六學啟復破觀音廟賊營四遂會軍關口攻克之進毀十里亭賊五營虎邱楓橋賊咸遁躡擊至閫門十二日張遇春李朝斌復由五龍橋進毀盤門賊六營蘇錫賊皆困鴻章由上海至程學啟婁門營親督軍攻蘇州因疏陳前後捷狀並請留黃翼升水師學啟軍河東旣親至營與學啟戈登周察城東南益下令進攻十月十六日夜漏四下軍士銜枚設浮橋猛攻之常勝軍傷亡多不得進秀成方入城助譚紹洸爲守十九日我軍盡出炸炮二十餘轟賊壘學啟緣南岸戈登緣北岸

鴻章親督之日過午牆傾十餘處賊當者輒碎伏窟中  
秀成紹洸率萬人突出婁門拒戰學啟令驍將王永勝  
陳忠德陳有昇周良才龔生陽朱寶元等分應之稍卻  
常勝軍肉薄登長城石壘皆破秀成紹洸遁入城陳東  
友水師復由黃天蕩登岸擊燬葑婁門外賊營二十餘  
處二十日齊門賊自驚擾黃翼升況文榜水陸乘之而  
潰李朝斌張遇春前破盤門六營復爲賊踞鴻章先檄  
嘉善西塘守將楊鼎勛以洋槍隊千人至是日會朝斌  
遇春軍克之副將尹連陞中賊砲死於是我軍水陸三  
面薄城賊洶懼紹洸最兇忍所部粵賊皆悍黨陷杭湖  
大郡至是猶死守而郟雲官等有貳心密送款於副將

鄭國魁乞降鴻章察賊已蹙無他虞學啟復單舸見雲  
官等於城北洋澄湖備得其要領命斬秀成紹洸以獻  
諸酋不忍於秀成諾圖紹洸二十一日秀成微覺之涕  
泣握紹洸手爲別乘夜攜其黨及輜重出胥門仍由靈  
巖木瀆水道以去官軍攻益急二十四日雲官與汪有  
爲刺殺紹洸及其眾千人夜開齊門迎降學啟令鄭國  
魁以二營入城二十五日獻僞慕逆譚紹洸首請驗學  
啟入城撫視時降酋列名者八人精壯猶逾十萬酋方  
歃血誓生死乞學啟請於鴻章要總兵副將官署其眾  
爲二十營仍屯閶胥盤齊四門內雲官且未薙髮學啟  
密白鴻章恐不可制必誅以定眾二十六日加午降酋

郜雲官伍貴文汪安均周文佳范啟發張大洲汪懷武  
汪有爲並出城請巡撫受謁察其狀誠叵測乃用計駢  
戮焉搜戮拒命者復二千餘人二十七日鴻章整部入  
城蘇州遂復鴻章會督臣曾國藩由驛馳上捷狀

兩宮

朝廷咸大慰加曾國藩優敘而錄李鴻章功

賞加太子少保銜黃馬褂程學啟亦

賞黃馬褂與黃翼升李朝斌同給雲騎尉世職其餘將士均優  
擢焉十一月初二日李鶴章督軍攻克無錫金匱縣城  
初鶴章等十晝夜滾營與賊搏既力卻秀成等圍十月  
十六日張樹聲周盛波由鴨城橋進破三里街賊卡屯

續修廬州府志

卷九十七

平寇紀畧下

十二

扼東門劉銘傳駐軍青陽西高山與萬壽橋賊逼其赴  
援東路也縣丞丁祖薌等於十五日乘霧出疑隊走賊  
分營萬壽橋爲進兵高橋地時無錫北惟高橋南惟望  
亭有賊十七日銘傳西歸十八日敗斗門秦巷之賊二  
十日以水陸攻克高橋賊營二十一日賊復至高橋擊  
走之陳坤書等來援知我已得高橋折往西斗門二十  
三日犯萬壽橋別由橫山綴官軍由錢周村渡河犯石  
幢橋銘傳分遣所部敗賊二十六日李秀成之眾方遁  
而西乘小輪船毀無錫西門橋以出繞至萬壽橋遣賊  
乘霧圍我營其輪船發炸炮衝高橋軍將致死銘傳率  
百人伏河埂膝行前以洋槍斃其駕船逆夷賊乃駛其

輪逸去而圍營之賊方填濠猛進見輪船已西始惶遽徐得勝劉盛藻唐殿魁等乘之大潰斬二千人秀成走常州郭松林亦於是日疊克新安望亭賊壘鶴章令松林進南門周盛波移進北門張樹聲進東門李正佩張士芳應北門符信余思樞應南門黃中元繞圍西南以絕宜興滕嗣武繞屯高橋以絕常州踞賊黃子澂聞蘇州既斬降酋率七萬人守尤力傍河亦築土城附城弔橋均護以數營我營已偪河干日填河與賊併命初一日盛波焚賊船百餘艘松林中元樹聲破惠山及亭子橋石卡初二日樹聲盛波松林先後破東北南土營俱盡望城頭賊漸移疾逾河舁梯以登賊不能拒猶巷戰

粵賊數千走北門盛波擊斬過半復出西門而五洞橋賊營已先破不得竄乃殲焉周壽昌手擒僞潮逆黃子澂郭松林擒其子黃德懋並獲僞酋數百人悉斬之斃賊二萬餘散脅從數萬鴻章親往視城守嘉善城東張涇滙爲松江婁縣與浙平湖縣達嘉善之衝嘉善賊守以四營十月二十日劉秉璋由楓涇往攻不利叅將王玉林死之秉璋傷股嘉善賊遂出犯秉璋軍累擊賊於干壑之鳳洞橋大通橋及東西茜涇互有勝負十一月初四日復攻張涇滙潘鼎新遣徐道奎趙濟川水師爲助始克之令袁發萬重暄駐守初平湖賊酋陳殿選乞降於秉璋不許十月殿選潛至大泖塘謁鼎新秉璋請

內應察其意誠許之及是復請期初六日鼎新遣夏金標潘鼎立進屯廣陳觀動靜秉璋令聶桂營張應魁進新埭楊鼎勳出隊干壑秉璋自進鍾埭以綴嘉賊初七日令徐道奎水師夜逼城下殿選勒所部圍殺逆館開城迎師擒斬賊將陶雲從江之源胡金鏘沈本立殿選率萬餘人降初八日遂收浙江平湖縣城殿選嘗約乍浦酋熊建勳同降建勳未決而乍浦甘酋至是亦約內應初五日鼎新夜督軍疾走過乍浦東門牛橋有踞賊襲殲焉乍浦賊遽戒備甘酋謀不得發鼎新因破其南北門外四營建勳懼亦乞降初十日鼎新以三營偪乍浦自勒兵平湖南門以俟十二日建勳降收乍浦城次

日鼎新令建勳隨唐宏成率軍至海鹽賊多建勳舊部亦降而澈浦城賊將遁建勳招諭之十三十四日復攸海鹽縣及澈浦鎮城鼎新等以四營駐平湖三營駐乍浦留二營守金山衛而令降眾守海鹽澈浦鴻章因其地去蘇遠令鼎新等自爲應援而檄程學啟速攻平望以制賊十五日璵城踞賊左元興犯海鹽鼎新軍同建勳擊走之毀其壘賊退沈蕩追入嘉興石門賊並犯海鹽北之璵城僞渠蔡元濂由海甯犯澈浦鹽城鼎新遣丁壽昌唐宏成分道援之令降眾擊賊賊俱敗歸十一月初九日劉銘傳進常州城北陳渡橋前營屯五里外由羊頭橋間道深入而圩塘賊適在後累戰皆捷令駱

國忠二營駐西施橋張桂芳等駐孫村徐得勝者貴進營河西而東路李鶴章令周盛波張樹聲由無錫進屯戚墅堰是日盛波抵擂鼓橋樹聲攻奪白家橋卡十一日進營白家橋盛波破城東三里橋卡敗城中援賊十三日鶴章由無錫至令各軍滾營進十四日銘傳令唐殿魁劉盛藻環攻圩塘破賊三營力戰卻城賊銘傳連破東北賊營數十收降眾萬六千人十五日夜漏未盡盛波樹聲至東門襲破賊二石營復破天甯寺基賊營據其壘與銘傳軍相應遂會攻小北門銘傳方瞭賊驟爲洋槍中額顛絕而蘇昇歸營盛波敗賊追過西門破南門石營十六十七日樹聲等晝夜環攻臨東門濠築

一營小北門及東門南北隅築三營皆偏賊百步十七日復會攻小北門賊敗入營乘之不克日旣暮樹聲率軍士越濠而過哨官王正典死之董鳳高踰牆入斫悍賊數十刀爲缺乃破其土城先是奔牛鎮踞賊邵之倫羅墅灣踞賊夏芝山萬錫階石橋灣踞賊張邦佐以眾乞降於銘傳受之令鄭龍彪靳春和水師隨道員馮席珍往察視直守十三日城賊出圍降眾各營孟河賊亦西至席珍等擊退之十四日攻克孟河汛城鶴章銘傳復遣唐殿選黃桂蘭二營往督降眾共屯牛以扼丹陽二十日李秀成遣句容僞章逆援常州至西門三里街鶴章令樹聲等分攻各門綴城賊自率盛波等九營禦



之僞章逆護逆治逆合眾五六萬蔽遮西南戰竟日賊漸懈周盛傳童邦喜率千人繞其外郭松林益擊南門賊卡賊各道受敵復以洋槍隊突之乃大潰追及七里橋破賊三營二十八日鶴章令松林盛波破南門德安橋賊復立附城一營陳坤書懼乃乞援於丹陽程學啟李朝斌進軍平望平望居吳江下游爲嘉湖大道方嚴寒學啟慮河冰合急進軍二十二日令劉士奇二營由南庫移屯梅堰塘防湖州賊而分其軍三道前朝斌水師入汾湖兜勦時鸞脰湖南北岸賊石城二土營三皆憑河爲濠臣石沈舟填大河而布椿支河以阻師學啟軍泅水拔之賊前來奪水師與戰陳東友中賊洋槍幾

殞王永勝張行科陸隊敗之賊夜襲我軍學啟設伏蘆葦中聲四起賊不敢近二十三日水陸三道攻賊賊不出學啟發炮炸斃之嘉興賊來擾朝斌禦之學啟軍攻益力旣逼賊營龔生陽王永勝率軍士前登石城土營次第破斃賊四五千斬其酋三十餘焚賊船五百餘艘獲大砲六十他軍械無算嘉興賊遁吳毓芬何安泰追擊之二十四日學啟令永勝安泰生陽行科攻九里橋朝斌由鸞脰湖會勦立破之復令士奇與阮炳福會水師攻克黎里賊營平望左右咸平學啟令毓芬駐二營於石城朝斌亦以二營駐守鸞脰湖楊鼎勛屯軍千壑洪家灘以截嘉興嘉善之道嘉善酋陳占榜余嘉鰲初

詣吳毓芬請降不許程學啟克平望占榜懼請益力獻子爲質毓芬以白鴻章乃命會學啟鼎勛劉秉璋圖之二十七日勒占榜盡撤城外踞賊秉璋鼎勛率小隊往列東西門毓芬軍入自南門二十八日學啟秉璋鼎勛咸入遂收浙江嘉善縣城而潘鼎新之軍方克沈蕩新豐鎮當嘉興賊犯海鹽平湖時往來屯營於此海鹽守軍旣敗僞會逆之眾僞渠陳炳桂陶金會僞將錢得勝併踞沈蕩日犯瓊城二十四日唐宏成督熊建勳等攻沈蕩盡燬其營二十五日鼎新由乍浦勦新豐距平湖十八里二十六日潘國揚等炸炮攻中路塌其牆丁壽昌等自上塘新篁里潘鼎立自竹林廟分攻其南北賊翼征皖之例暫由江蘇遣員往署其事

詔允行陳坤書之乞救於丹陽也僞忠逆子及林紹璋等應之屢攻孟河汛石橋灣羅池灣各降眾營壘皆陷唐殿魁黃桂蘭屯奔牛與降酋邵之倫守甚固賊築十餘營困之李秀成猶蓄白齊文一輪船日飛而復來者初攜妻孥輜重至溧陽亦由溧陽入奔牛運河發三十二磅炸炮日夜擊我營十二月初三日劉銘傳抽攻城隊伍二千由湯莊橋突圍入距奔牛八里賊出大隊迎拒我軍戰且進村樹中伏賊盡起傷二百餘人終不得達殿魁

等遞帛書告急初五日銘傳乘夜遣銳卒賫洋火藥捲四萬具達其營命堅守十日以待初六日銘傳與郭松林皆自將三營滾營進由西門至奔牛道中皆賊營以偏師搗之止則倚行營自固李鶴章令曹仁美周蘭亭董鳳高率兩營槍隊繼進爲應秀成世賢坤書益由金壇溧陽丹陽常州增賊數萬至奔牛期必破我軍以解城圍鴻章檄況文榜由太倉楊鼎勛由嘉善分進常州江陰未及至鶴章復遣吳超凡等四營並檄無錫守將黃中元滕嗣武率槍隊千人繞赴李士橋與銘傳等會軍十四日晨約戰賊嚴陣以待銘傳以炸炮擊其面橋前營松林由上游攻賊東南並擊城賊行隊中元嗣武

由下游攻賊西南並擊螺螄灣賊而密令殿魁等伺隙夾擊松林軍斃賊數百銘傳炮毀賊壘丈餘與松林等犄角進賊亦發槍炮甚猛蘭亭仁美蔽藤牌膝行逼賊炮門擲火蛋斃然炮賊周麾而登破賊東營銘傳揮刀摧隊發噴筒火箭隨烟突入斬賊數百亦破其營迤西賊皆亂嗣武越牆入賊奪門走中元截擊之而隔水賊大至松林嗣武左右擊敗之仁美方率洋槍隊逾浮橋輪船逆夷發炸炮仁美率死士涉水傍船擲火蛋然其藥艙裂如前輪船逆夷與賊皆死獲其三十二磅炸炮與鷓首大炮銘傳督隊衝奔牛賊猶數萬繞其後松林方殿以馬隊數十突賊陣鳳高以排槍蹙之賊大潰西

奔丹陽於是殿魁桂蘭等奮呼出營分道逐賊十餘里破賊營三十餘計斃賊近萬擒逆夷數十人是戰以官軍四千摧悍賊十萬再焚賊輪船李秀成復氣奪走時嘉善既復劉秉璋所部進屯新豐蕭山門程學啟令劉士奇屯王江涇十二月二十一日嘉興賊僞榮逆廖發受出犯劉秉璋潘鼎新由東南門大破之發受乞降鴻章命學啟偵之賊布守嚴未可信決進勦學啟以四營與李朝斌水師進屯金橋秉璋與吳毓芬四營進屯七里店鼎新軍由海鹽平乍遙應之而常州賊由西門過河築二營復犯東西門官軍二十七八九日劉銘傳張樹聲等屢敗之同治三年正月鴻章令郭松林將六營

黃中元滕嗣武五營王東華成俞卿鄧長里水師三營及戈登常勝軍往會勦檄鶴章及劉銘傳屆時益攻常州俾賊首尾不能顧時松林戈登等既進軍李鶴章復遣楊鼎勛由常州往先後屯和橋十九日松林等率隊偵賊敗賊北門焚其卡東西北三門出賊欲困官軍水陸分道迎擊之擒斬數百松林嗣武咸被創二十一日常勝軍進河東松林等陸軍進河西水師泝流上二十二日各軍屯三里橋常勝軍攻東門他軍分攻上湖橋及西門賊營並截溧陽竄賊二十三日東門及上湖橋賊營俱破僞代逆黃靖忠由張渚遶西泆登陸分犯城東西水陸官軍擊敗之自東泆至西泆追之四十里奪

賊船千餘艘復破其西門營於是城賊無援夜戈登仍  
攻東門嗣武攻北門王萬釗劉起應之中元攻西門易  
用剛黃式壽應之吳建瀛攻南門高占彪周河清應之  
水師入東西汎屯二營於上湖橋截竄賊賊逸自西門  
殺之過半餘眾降二十四日遂克宜興荆溪縣城黃中  
元鄧長里等水陸七營駐之程學啟等偪嘉興十九日  
學啟軍方築壘北門僞逆廖發受劉得功以礮船前犯  
由西門出數千人學啟分禦之陣斬劇賊劉秉璋軍亦  
移駐朝陽廟及七里店會龍橋二十三日潘鼎新率三  
營來會時東北門賊壘尤多議以學啟軍與淮揚太湖  
水師分攻城北杉青橋御花園端平橋李昭慶攻秋涇

橋秉璋鼎新所部水陸攻城東吳涇橋東塔吳毓芬攻  
合歡橋二十四日學啟軍分五路進城賊萬餘出援猝  
爲所撼學啟率親兵由小西門繞城河出賊後賊卻顧  
前軍攻益急乃破小西門北門賊營七擒僞酋劉得福  
賈慕仁陣斬悍賊千餘奪大礮五十守備姜寶戰不力  
斬之以徇昭慶軍三路達秋涇橋城賊適饋火藥入其  
營我軍乘而入賊兩營皆潰吳涇橋至合歡橋賊踞四  
營秉璋等方攻克大石壘東南門亦各出援賊擊走之  
追至鹽倉橋而合歡橋賊阻河死守吳毓芬令吳兆楣  
伏河干發炸礮擊登壘賊吳毓蘭率死士渡河炮船繼  
至營亦破是日力戰營官劉士奇周正林潘國揚黃士

林聶桂榮皆被重創東北門賊亦殲除殆盡湖州賊圖  
援嘉興屢竄南木壇圯四亭子新塍思犯盛澤平望擾  
我後路淮揚太湖駐防水師敗之學啟益督各營圍城  
築炮臺二十八日炸炮壞城垣十餘丈水師已設浮橋  
就學啟令何安泰劉士奇率千人踰河乘城自率陳忠  
德王永勝繼之賊然火藥傾而下不克登何安泰猝中  
賊洋槍死之水師李助發周正林趙三德俱重創軍士  
死數百乃罷攻湖州賊復犯盛澤圍王江涇後路營二  
十九日學啟令王永勝鄭國魁往敗之二十七日戈登  
郭松林王東華等水陸由宜興進溧陽沙棠港賊二千  
來降受之松林敗賊於建渚二十八日攻毀張渚賊十

營二十九日戈登由徐舍進盡毀賊卡僞侍逆李世賢  
踞溧陽其下吳人燕梁柏和等思反正未得間及是世  
賢由張渚敗歸人燕等閉城不納粵賊悉從世賢遁湖  
州泗安旋入皖南二月初一日人燕迎降初二日松林  
等入收溧陽縣城初三日遂進金壇初四日敗僞劉逆  
襄逆之眾於楊巷追至金壇南門初五日盡毀金壇城  
外賊營都司張榮魁死之而是時常州賊陳坤書方合  
丹陽句容賊十餘萬由西道繞出常州城北築營數十  
日犯我軍劉銘傳屢擊退之正月二十六日繞犯羊頭  
橋況文榜營文榜與鄭龍彪水師敗賊李鶴章令楊鼎  
勛周盛波由南門移城西初二日坤書率萬餘賊來爭

鼎勛等力戰竟日始破賊劉起彭昌諭死之賊覘圍城之師無可乘乃圖繞竄腹裏值陰雨連旬道中積泥潦不利行初四日丹陽踞賊陳時永糾數僞逆及宜興溧陽殘賊循江岸迤東圩塘夏港青山等處冒雨馳初五日奄至江陰縣之南閘距城二三里初六七日至周莊華墅楊舍初十日犯常熟城十一日復犯福山所過焚殺於是江陰無錫常熟皆警蘇州以西大震鴻章飛檄松林東華等棄金壇勿攻與黃中元宜興二營倍道歸援飭常州諸軍堅壁勿戰令鶴章攜小隊守無錫楊鼎勛張樹聲選精銳三千橫截江陰之焦店青暘以阻其歸李昭慶二營鄭國魁水陸三營由嘉興賈宏材由無錫符信由蘇州先後俱赴常熟助守各軍亦冒雨行初十至十三日次第皆應令至賊方併集江陰常熟無錫間而圍攻常熟尤急符信魏承樾賈宏材朱開泰分門禦賊賊漸蔓延張涇橋東亭直趨無錫十三日鶴章登陴督守令黃中元余思樞衛汝忠迎勦追之八字橋擒斬千餘人松林馬隊分擊堰橋賊亦敗之無錫賊乃退樹聲由焦店進南閘花山鼎勛由青暘進郁橋華墅皆有斬馘當賊分犯江陰城守將駱國忠李正佩張士芳等力擊敗之江陰城圍亦解賊遂併趨常熟北自福山南至顧山王莊數十里皆賊提督黃翼升方率淮陽水師四營返自江北乃留一營助守江陰十四日自

督三營由白茅口進常熟與王東華等水營並集國魁昭慶軍亦入城十六日越虞山而下並出東北門擊賊松林軍復由嚴家橋將至賊出不意驚怖乃大破之毀其營松林方過王莊僞滕逆利逆眾三萬踞焉松林軍突賊陣黃式壽死之賊旋敗潰追殺二十餘里顧山陳市賊皆盡由大河徑趨常熟城賊目陳思永及僞忠逆子復率眾前阻擊追至浮橋翼升東華水師截之追至城西遇國魁軍掩殺之伏尸積道十七日追賊過劉家橋福山松林等循江岸至楊舍國魁等循顧山入內地常熟圍乃解餘賊三萬人屯楊舍周莊華墅沙山屢奪路而西輒爲樹聲軍截擊歸時丹陽以西白兔水湖博

洛諸賊亦爲馮子材鎮江之軍所敗次第乞降二月十八日程學啟攻克浙江嘉興府城初嘉興賊守禦甚力官軍多傷亡又遇雨兵不得舉學啟方繕攻具修炮臺圖猛進賊沿江竄學啟得鴻章檄益思速下之而西援十五日雨止令各軍薄城夜督軍士於城下端平橋築月牆護炮學啟手然田鷄炮斃賊十六日水陸分門擊之賊發火器甚厲增月牆三道蔽賊炮勇丁縛草膝行前築之環攻不息十七日學啟督部將劉玉龍教練洋人備雷發大炸炮毀城頭炮臺二十餘壞城垣百餘丈賊爭負土堵城學啟揮旂詭欲登城俟賊聚乃然炮中者輒死數百夜督親兵成浮橋賊亦鑿城根實炮於中



以拒徐佩璆乘飛划奪其炮十八日湖州賊僞堵逆黃文金由新塍犯軍後學啟方攻城遣張家瑜張自全擊走之城賊漸不支學啟促將士梯登北城死者相枕藉學啟憤躍逾浮橋肉薄登城槍子中左腦昏絕舁歸營其下益裹創冒死爭進炸炮中賊火藥倉聲驟沸賊始亂潘鼎新劉秉璋李朝斌所部水陸咸登城城乃破粵賊猶巷戰擊斬五六千級或遁自西門截殺之靡遺炮斃劉得功獲廖發受於井斬之二十一日朝斌士奇永勝復敗黃文金於新塍四亭子盡毀其營學啟創重歸蘇州事聞降

詔詢傷狀

續修廬州府志

卷九十七

平寇紀畧下

二十五

賞學啟玉翎管玉搬指玉柄小刀各一事荷包一對並獎諸統領賊之沿江下竄也窺官軍聚攻常州嘉興腹地空虛冀出不意闖常熟或江陰無錫一縣城踞之以撼常州嘉興之圍鴻章悉其情檄各城固守常州嘉興軍勿動抽調精銳期會俟集而後舉先絕其歸竄之道援軍既次第擊卻賊賊之屯楊舍華墅周莊沙山者不能出漸饑窘常州丹陽賊屢率眾由江陰青山等路圖入救遇伏皆敗歸二十四日戈登猝以八百人入楊舍賊巢不謀之他軍軍無應援幾覆沒戈登先攻金壇傷股未愈鴻章乃慰遣令歸溧陽治創時已克嘉興檄劉士奇王永勝統程學啟所部三千人會郭松林軍循福山荒苑

江岸進擊三月初二日鴻章自赴江陰長涇察賊勢督戰賊方自楊舍南至周莊華墅夾山爲營楊舍汛城小而堅難猝克乃令擊其中道以斷賊初六日士奇永勝松林由北路鴻章與弟鶴章昭慶及黃翼升鄭國魁水陸由南路均抵沙山距華墅三里賊列隊山阿倚營拒官軍攻破其營逐之四十餘里自華墅至樹山平賊卡累百日已暮遂令鶴章昭慶松林繞江陰會駱國忠張樹聲等自北截之士奇永勝駐周莊邀擊楊舍賊鴻章自督國魁及黃中元張志邦王東華等水陸疾抵青暘會鼎勛等出其南楊舍賊惶遽夜竄雲亭士奇等設伏雞籠山敗之先是初四日賊目陳思永僞忠逆子聞東

路官軍大至率萬餘賊由華墅花山夜馳三河口設浮橋六道爲羣賊歸竄計憑河築壘自護次日張樹聲劉盛藻出小隊誘賊出嘉望山敗之及華墅周莊楊舍敗賊旣集雲亭北至南閘南抵越城橋均欲過三河口而西鴻章令諸軍會勦初七日松林昭慶列陣南閘前國忠由花山繞擊賊知竄路絕益致死官軍橫截之松林大破三河口賊營賊爭道六浮橋盡斷尸積水不流鼎勛中元斷賊後隊樹聲等擊其已渡者賊咸棄械跪就縛斬溺俘獲近二萬人遺所掠衣糧盡以給流民奪路西逸者僅千餘人沿江竄賊乃盡三月初十日遇缺提奏提督江西南贛鎮總兵勃勇巴圖魯程學啟傷重歿

於蘇州學啟之攻嘉興也坐炮臺三晝夜自然炮擊賊  
迨被創歸鴻章旦夕往視醫調醫者言創可合惟火毒  
入心絡既創果漸合留敗骨爲梗醫言不可去學啟自  
拔之傷及喉舌遂不能食飲而絕年甫三十五所部開  
字營冠諸軍後奉檄增募至萬人克收省會成大功每  
赴敵迅疾賊畏之目爲神軍尤嚴紀律所過無幾微擾  
江浙士民靡不痛惜鴻章具疏以狀聞且敘學啟戰功  
爲近歲東南第一

降詔軫悼

賜祭一壇

追贈太子太保

續修廬州府志

卷九十七

平寇紀畧下

二十七

予諡忠烈以提督陣亡例議優卹給騎都尉世職事蹟

宣付國史館立傳安慶蘇州嘉興俱建專祠子建勛俟及歲吏

部引

見部將王永勝卽授南贛鎮總兵劉士奇授古州鎮總兵  
分統其眾鴻章至常州督諸軍攻城時城西賊營猶二  
十里西北通丹陽西南通金壇夾運河左右環列十四  
日東南門出隊綴城賊而劉銘傳攻西北六營盡破之  
十五日令郭松林楊鼎勛全隊由戚墅移營城西南十  
七日王東華水師自溇湖進萬年橋松林鼎勛攻陳渡  
橋賊大營程學啟舊部炮隊助之鼎勛自乘牆賊洋槍  
貫胸脊猶揮將士格鬪松林繞擊賊後乃破之餘十營

皆潰鄭國魁營新闢與賊距一水銘傳往設浮橋渡河東華水師亦出三河口周盛波張樹聲等折向西北夾擊復平河干賊營二十餘鄭國魁張桂芳駐河北松林鼎勛軍駐河南賊西道皆絕惟小南門西門附城十數營十八日益令各軍分道擊破之陳坤書方登城恐官軍躡敗賊入城閉門拒不納悍賊咸死城下乃合圍二十一日令劉士奇王永勝昇大炮攻小南門戈登常勝軍炸炮攻大南門而銘傳炮隊攻北門二十二日壞城垣數十丈遣死士樹梯登坤書自拒大南門其兄飭諸逆拒小南門僞列逆費酋拒北門亦選洋槍隊數千抵城缺然火藥雜甄石俱下官軍與賊皆死枕藉炮斃僞

誌逆而炮彈盡天且雨復罷是時馮子材富明阿之軍亦由鎮江進丹陽沿江孟河圩塘魏村螺螄灣方家橋賊萬餘人先後獲髮繳僞印降於我水師守將周國興悉遣散之提督鮑超軍先由高淳東瀾攻克溧水句容縣城三月二十一日復進攻金壇縣城戈登初駐溧陽其赴調也鴻章命吳毓芬率水陸五營往代十九日鮑超軍偪金壇賊窮出走二十日毓芬知賊至南渡距溧陽近自攜三百人往賊方列南渡東北小山設伏擊敗之夜賊至小蜀山丁上橋周城鎮距南渡三十里二十一日黎明毓芬率隊至烏鴉嶺擊斬數十名追過周城橋二十五日僞直逆約常州西路賊萬餘同竄廣德屯

南渡舊賊營毓芬率陳占榜余嘉鰲出正道遣弟毓蘭由山腹出招仙橋以截賊羅義勝炮船扼南渡陸軍銜枚疾進夜漏二下至南渡登山分隊圍村卡賊方寐悉斬之營賊乘黑出聞四山鼓角聲警愕自蹂躪逸賊至招仙橋遇毓蘭軍復斃無算二十六日追至建平縣界始還陣斬僞渠林得英黃有才李六袁得勝等酋擒僞將黃金龍四月初一日鴻章在常州行營督繕攻具皆備賊取埋棺敗船蔽絮堵城缺日發槍炮相敵鴻章令軍士循河築月牆百數十丈蔽賊槍而溝其下可容二千人夜由竇出設浮橋賊覺出擊則復入初四日成浮橋六顧久雨不霽乃默禱於關帝之神初五日雨稍止

戈登炮隊攻南門劉士奇王永勝攻東南隅以常勝軍多傷亡不宜復先登令郭松林楊鼎勛所部伺戈登軍所擊缺而常勝軍應之士奇永勝自選勇士登所擊缺而張樹聲軍應之劉銘傳獨攻北城初六日方午天大霽反風煙焰撲城頭水陸炮聲發如雷舊壞城復傾數十丈賊以人塞缺口受炸炮旋死旋集終不退鴻章益揮軍登城松林永勝士奇趣隊攜籐牌噴筒薄城賊傾火藥以長矛格刺軍士已墮六七不顧卒擁而登接刃戰城頭久之賊始敗賊方下城銘傳軍已登北門僞護逆陳坤書僞將費酋攜粵賊數千戰於衢至暮賊不能軍退入所居僞逆第猶列洋槍拒於門龔生陽突入擒

坤書周盛波亦擒費酋水陸軍咸越城賊縋而逸者數百仍截殺之銘傳松林等令於城棄械者免於是跪而降者數萬人殺賊逾萬官軍前後亦亡千餘人乃復常州府城初八日遣劉銘傳郭松林進軍會攻丹陽至奔牛聞丹陽賊內亂陳時永見殺餘賊由南門出走富明阿馮子材之軍已入收之乃還時鮑超軍方駐句容東壩僞侍逆李世賢等先後由安徽休歙祁門等縣分道竄江西皖南防軍總兵唐義訓道員毛有銘勦賊失利賊遂入江西曾國藩檄超軍援江西屬鴻章軍往代防乃遣銘傳以十四營屯句容鄭國魁以五營屯東壩周盛波以八營屯溧陽之南渡定埠未幾馮子材鎮江防

軍復奏請凱撤鴻章命張樹聲統所部由常州往駐之潘鼎新駐平望劉秉璋駐嘉興浙師方克武康德清石門三縣將進軍湖州閩浙總督左宗棠貽書於鴻章言嘉興可勿屯兵而請遣軍攻長興縣鴻章檄秉璋軍歸駐松江防松滬因長勝軍之撤並以塞洋人意也湖州賊方竄湖濱楊漚大錢口鼎新分數營屯於南潯震澤以遏其衝長興縣直湖州西毘連宜興溧陽及廣德州鴻章因令郭松林楊鼎勛劉士奇王永勝等三十營由宜興分道往取之李朝斌太湖水師及歐陽利見陳東友淮揚水師入夾浦口會勦聶桂榮等水陸五營進吳淩以應鼎新軍五月初七日湖州賊僞昭逆黃文英等

率賊數萬犯吳淩竄擾陸家灣軋村殷瀆村丁公橋初八日賊圍陸家灣練勇營鼎新會丁壽昌擊退之又敗賊丁公橋殷瀆村毀其卡擒僞朝酋史得成初九日鼎新自赴南潯桂榮軍亦至吳淩賊東犯壽昌復敗之南貨港仍追至殷瀆村唐宏成等敗賊大廟港初十日鼎新軍大破賊吳淩毀其營卡桂榮壽昌進殷瀆村賊匿桑林中設伏誘之出敗之屯軍天到橋十一日破殷瀆村賊二營中塘軋村織里援賊咸至敗退喬淩桂榮等乃駐軍吳淩初九日朝斌由西洞庭山乘風抵夾浦口賊爲石壘象公廟前設大礮當湖口左右夾河流立卡於橋以自護朝斌冒雨以洋槍陸隊乘之水師張翼進

斫蘆葦填河賊發炮拒朝斌乘舢板登岸驟緣炮洞入其營賊驚潰斃僞列逆江逆總兵陳定國江福山俱被重創初十日陸軍至松林士奇鼎勛駐施溪夾浦永勝駐湯橋烏溪以備廣德泗安十一日松林等赴長興毀城東上莘橋跨塘橋賊營遂偪城下十二日朝斌水師進城東北復漾村十四日敗賊北門小東門於是松林軍東門鼎新軍東南隅士奇軍北門永勝仍軍夾浦應後路鼎勛令曾明魁屯二營於中道西莊橋設浮橋通前後十七十八日湖州僞堵逆黃文金遣二萬人來援進東南其弟僞昭逆文英數萬人由廣德泗安進西北城賊出與相應松林等分道禦賊二十二日松林鼎勛

由五里橋擊湖州賊永勝繞新塘口出其後士奇由磨盤山擊廣德泗安賊朝斌水師出其後夾勦大破之斃賊萬餘附山賊營盡毀二十三日援賊遁未遠增隊更至復破之追殺二十餘里乃設浮橋急攻城炸炮裂其垣分登南北門賊猶猛拒營哨官死者四人傷五人仍畢登賊不能遁盡殲之遂復浙江長興縣城時湖州賊屢犯南潯吳淞聶桂榮丁壽昌等敗之潘鼎新復以炸炮盡毀湖濱賊營賊遁中塘織里與浙中軍相拒六月十六日浙江巡撫曾國荃大軍克江甯省城鴻章方由太湖親赴長興閱視防守擬遣劉士奇王永勝所部由長興劉銘傳所部五成槍隊由句容皆攜炮隊分赴江南渡守將周盛波等分道截竄賊

詔敘平賊功李鴻章與浙江巡撫曾國荃皆封一等伯

賞雙眼花翎金陵既平賊所聚惟湖州府城湖州西南倚叢山其東北多水道險固可守是以趙景賢擋拄賊中而陷亦獨後僞堵逆黃文金猶擁眾十萬踞之恃廣德泗安孝豐安吉爲門戶事急則出徽浙達江西而先竄江西之賊亦可由徽浙回援浙師既克孝豐遂進安吉左宗棠方注意安吉圖截賊竄道並令總兵高連陞王月亮降將蔡元吉鄧光明等進湖州東南五月初攻克菱湖



東林山進營妙喜鎮爲賊所乘師小挫鴻章以蘇湖接壤李朝斌水師止能禦賊太湖乃命郭松林楊鼎勛屯長興周盛傳往溧陽代吳毓芬而移毓芬屯夾浦口爲湖西之師劉秉璋所部由松林移平望助潘鼎新平望吳淞南潯各營爲湖東之師朝斌由大錢小梅各口進蹙湖郡西北浙師蔡元吉方軍長超山賊圍攻之急統領布政使蔣益澧乃函屬鼎新攻晟舍湖州悍賊集晟舍北自織里至湖濱西自錫山至郡城不絕浙軍張景渠屢攻之不克勢且犯南潯六月二十二日鼎新移平望二營屯舊館頭偪賊而令唐宏成等出行隊繼之晟舍賊四營倚兩河爲濠我軍亦隔水立營置炸炮二十

三日擊毀其營中屋分隊敗援賊軍士浮水過至第二河賊布樁水中而樹鐵籤其上不得進越日朝斌水師至鼎新亦以小火輪船駛入二十六日乘夜復前築兩營爲犄角分數營駐舊館東西相應集水陸攻之二十七日炮壞賊營數丈水師江福山躍而登各軍將繼之援賊猝至營賊起發洋槍洞福山胸遽殞乃退賊益於營外築長牆穴其中炮擊我七月初一日復毀其牆及石橋炮臺再踰河賊填柴炮臺缺處傾火藥軍士多傷亡復罷攻鼎新益備竹牌濕絮爲蔽禦而議分軍繞賊後設浮橋距其北仍力攻於前以綴之十一日令潘國揚等夜出北路爲橋水陸迭擊之不息十二日浮橋成

數道敗織里復林援賊猶阻於賊河干炮臺十三日設  
伏葉林備織里賊先破其北利濟寺賊卡水師乘炮船  
進盡拔水中榼張景渠浙軍亦出助次第毀其石壘大  
破之追至昇山八里店南北官塘賊死過半軍士亦傷  
亡數百將領被創晟舍乃平湖州之西呂山尹隆橋大  
德橋皆達四安廣德之道二十二日郭松林由長興南  
進跨塘橋自至呂山察賊勢二十三日往攻之先拔山  
腹賊營叅將廖玉林死之賊亦旋潰追殺千餘人賊遁  
尹隆橋二十七日劉士奇王永勝楊鼎勛皆率師至進  
扼尹隆橋大德橋與賊隔水而軍二十八日松林士奇  
鼎勛分道敗賊鴻章檄劉銘傳周盛波由東壩建平進

取廣德潘鼎新由舊館進晟舍劉秉璋由吳淞楊淩進  
大錢口復檄張樹聲軍赴湖州助勦由平望南潯次第  
移營織里察知賊困窘必將西趨益促松林等進軍賊  
先於尹隆橋立數十營臨橋築石卡圍以月牆復設浮  
橋分營上流橫塘渡爲應增修月牆外濠二重引河水  
灌之立木爲城五周以示密松林等亦築長牆置炸炮  
七月十五日炮毀其月牆湖州賊來援守賊伏穴中發  
洋槍哨官張祖述死之十六日攻之竟晝夜松林鼎勛  
令潛拔其濠外木十七日軍士奮而登呂山大德橋橫  
塘渡駐軍俱出截援賊永勝士奇率隊前松林鼎勛於  
後督之已抵內濠賊槍中松林臂復遇雨火藥盡溼仍

退軍黃文金選悍賊數千出呂山後阻我糧道十九日  
松林令李長樂等三營繞屯李家巷賊撲洞子門叅將  
何錫恩死之二十日賊自尹隆橋八字橋洞子門沙水  
橋白龍洞袤延二十餘里來犯松林令易用剛迎賊自  
督李長樂等斷後士奇永勝由呂山夾擊敗賊擒斬數  
千人賊渠黃十四斃於陣追賊過洞子門別隊賊出後  
山小徑復擊之松林等以賊方聚守尹隆橋猝不可下  
當擊其虛二十五日松林令李長樂出哨青草塢至洞  
子門士奇令張家瑜等設浮橋北岸小河芟荆棘闢道  
二十六日夜分軍士攜木筏纜擊之達南岸劉玉龍礮  
隊仍擊尹隆橋長東等由洞子門登山擲火箭詭攻八

字橋而松林鼎勛士奇永勝咸親督軍趨大德橋渡河  
圍攻賊營賊大駭愕悉破之並破沿山賊十餘營士奇  
率所部移屯焉廣德泗安之道遽絕二十七日城賊傾  
巢出爭松林等約束東路軍疾攻城分伏六營於尹隆橋  
八字橋河干伺之文金挾悍賊數萬至勢甚驟松林與  
王平西水師迎其左永勝由山徑迎其右鼎勛士奇逆  
戰文金袒而銜刀狂突數四槍礮密格之不得前鼎勛  
士奇揮眾橫斫斃賊無算乃反奔追之橫塘渡尹隆橋  
伏起殺賊松林等繼至守賊亦潰盡破其營李長樂復  
破八字橋截賊會潘鼎新等已與浙軍奪府城敗賊乃  
折而迤南分道奔安吉松林等追賊港口小溪口及安

吉縣之梅溪鎮逼之山谷間殲其大隊文金逸去當文金出犯時鼎山賊先一夕棄營走鼎新與浙軍劉樹元等追及之八里店復及之三里橋朝斌秉璋樹聲進大錢口毀賊營二十七日乃共收湖州府城長興守將吳毓芬聞賊由林成橋達泗安夜率八百人冒雨出軍士負小舟至觀音橋渡河奪賊營二十八日破午山橋林成橋賊追之泗安泗安賊亦出拒隔水設伏敗之降其眾千餘人遂克泗安鎮而梅溪竄賊適至毓芬扼橋待之中夜賊徑前問訊詭言僞昭逆部也伺其近猝起擊賊驚而奔追之十餘里二十九日黎明及之復降其眾四千人三十日入山搜戮餘賊浙軍適至毓芬乃返長

興而劉銘傳進廣德之軍二十五日抵建平聞僞昭逆黃文英方挾洪福瑱踞廣德建平達廣德阻於陸程銘傳留數日籌運道令周盛波黃桂蘭張志邦等先往屯白茅嶺水口二十八日自率劉盛藻黃中元至桃成舖二十九日桂蘭志邦至橫山頭則文英已挾福瑱出走甯國山中餘賊猶迎拒敗之追至廣德西門溧陽守將周盛傳之軍亦至賊由南門逸追殺數百人遂收廣德州城三十日僞堵逆黃文金始由泗安芻趨至廣德東門官軍出乃奔文金抵界牌距城三十里聞之疾折而南廣德中道達孝豐左安吉而右甯國然山徑叢歧銘傳令分道追之八月初一日自率桂蘭志邦躡繞其前

薄暮至孝豐之劉村遇賊擒斬數百初三日黎明設伏山中伺賊隊大霧旋四塞及散而賊已過銘傳親馳及之賊數千殊死博戰殺傷過半日暮途險將士皆饑疲乃舍之盛波追賊甯國境盛傳追賊安吉境皆有斬獲浙軍亦收安吉縣城吳中乃解嚴自鴻章統師東下迄於功成凡二十九月先後收定省會及蘇浙皖所屬府廳州縣衛汛二十有四城初至滬時止十三營攜曾國藩舊部楚師日湘軍自招鄉里健銳日淮軍嗣後次第募淮軍合淮揚太湖兩水師水陸增至一百四十營當元年時上海稅釐所入可供五萬人前巡撫之兵四萬以次潰散遣撤幸足贍新軍然自漢口九江設關分收

洋稅海關稅日減軍中帑項恆恃釐捐選用廉勤劾治侵欺積習嚴立法程綜覈出納斬於克濟蓋至是共供水陸軍需銀八百五十九萬兩而常勝軍並英法礮隊各營教習洋弁口糧及租用輪船外洋軍火購價復糜銀二百八十餘萬兩是歲以釐稅所入益短紕軍士月止足半餉負銀至七十萬兩疏請造餉票償之旋以爲不便復止曾國荃所部軍旣凱撤鴻章復與曾國藩會疏請撤富明阿揚防之軍於已所部亦思裁軍節餉而朝廷方重淮軍四年春以閩賊未平遣郭松林楊鼎勛十六營赴閩克漳州夏四月捻匪復熾遣潘鼎新十一營赴天津衛畿輔皆以火輪船航海行淮軍槍礮隊雄天下

用西洋軍火以長炸炮攻城垣而以短炸炮擊賊陣及營壘所向無不克槍隊軍士習英法二國號令步驟彌精嚴蓋始於程學啟所部鴻章前後累列水陸各軍出力文武弁疏請獎敘及萬餘人又自提督程學啟而下死戰者數千人請於無錫惠山建淮湘昭忠祠並紀淮湘將士死事戰蹟爲昭忠錄